

Nakon pribavljenih mišljenja Federalnog ministarstva finansija, Federalnog ministarstva pravde i vladinog Ureda za zakonodavstvo i usklađenost sa propisima EU, Federalno ministarstvo zdravstva donijelo je naredbu o proglašenju epidemije zarazne bolesti COVID-19 za ugroženo područje, teritorij Federacije Bosne i Hercegovine. Naredba je stupila na snagu danom objavljivanja u Službenim novinama Federacije 17.07.2020.

Donošenju naredbe o proglašenju epidemije prethodilo je usvajanje Informacije Federalnog ministarstva zdravstva o pogoršanoj COVID-19 epidemiološkoj situaciji u Federaciji BiH na sjednici Vlade FBiH od 02.07., koja je jednim od zaključaka uz usvajanje Informacije, federalnog ministra zdravstva zadužila da sukladno svojim ovlastima proglasi epidemiju COVID-19, te kao ugroženo područje odredi cijeli teritorij Federacije BiH.

Naredbu je uz spomenuto, federalni ministar zdravstva donio na temelju članka 6. stavak (1) Zakona o zaštiti pučanstva od zaraznih bolesti i članka 66. stavak (2) Zakona o organizaciji organa uprave u Federaciji BiH, kao i na osnovu epidemioloških izvješća Zavoda za javno zdravstvo Kantona Sarajevo, Doma zdravlja Tešanj, Doma zdravlja Maglaj, Instituta za javno zdravlje Zenica, Doma zdravlja Živinice, Zavoda za javno zdravstvo Tuzlanskog kantona, kao i uz stručno mišljenje Zavoda za javno zdravstvo Federacije BiH.

Proglašavanje epidemije COVID-19 na cijelom teritoriju FBiH ne odnosi se direktno na stanovništvo, već podrazumijeva operativnije djelovanje svih mjerodavnih institucija koje postupaju u datoj situaciji, te provode mjere za sprječavanje širenja COVID-19 na teritoriju FBiH.

Naredbom je u slučaju potrebe i u ovisnosti od situacije predviđena mogućnost vršenja sanitarnog nadzora na graničnim prijelazima koji se nalaze na teritoriji Federacije BiH i provođenje mjera u vezi sa vršenjem tog nadzora, karantena, osiguranje potrebnih rezervi cjepiva kada cjepiva budu dostupna, imunizacija stanovništva kada cjepiva budu dostupna, kao i provođenje drugih mjera koje naredi federalni ministar zdravstva odnosno Vlada Federacije BiH.

Federalno ministarstvo zdravstva je nakon sastanka predstavnika kriznih stožera/štabova kantonalnih ministarstava zdravstva i predstavnika zavoda za javno zdravstvo kantona/županija održanog 10.06. sukladno konstatovanoj situaciji, shodno prijedlozima i zaključcima sa sastanka, kao i zahtjevima Ministarstva zdravstva Kantona Sarajevo, Ministarstva zdravstva TK i Instituta za javno zdravlje Zenica, pokrenulo proceduru za proglašenje epidemije COVID-19 u Federaciji BiH gdje je ugroženo područje cijeli teritorij Federacije BiH, a procedura je mogla biti okončana tek nakon pribavljanja spomenutih mišljenja.

Svjetska zdravstvena organizacija proglasila je pandemiju COVID-19 11.03.2020. godine, što znači da je ovo zarazna bolest od javnog međunarodnog značaja koja zahtjeva angažman cijele svjetske zajednice, a epidemija na teritoriju FBiH nije proglašena ranije s obzirom na stanje nesreće koje je bilo proglašeno već 16.03. i koje je praktično zamijenilo tu mjeru.